

FURLANS E CARINTIANS INTUNE COME FRADIS

In cheste domenie, 4 dal mês, i Udinês a son lâts sù dôs voltis sul plaçâl dal lôr cjistiel: une volte devant misdî par sintî discors, e une volte dopo cene par sintî cjantis e viodi danzis. La seconde volte a jerin plui dal dopli de prime.

Paron, cui che al vûl, di pensâ che la difference e dipendi de scjarse cussience e de pocje educazion politiche dal popul, che al cjate plui gust a viodi e a sintî la zoventût che e bale o che e cjante, che no a scoltâ sermons di economie o di politiche. Ma, a pensâle ben, al podarès ancje nassi il scrupul che la vere cause di chest compartament e vadi cirude, invezit, tal spirt positîf de nestre int. Ancje cence rindisi cont di ce che al fâs, il furlan al bacile pôc des cjararis e al va daûr dai fats.

Lis dôs assensions di domenie a vevin cheste difference: devant misdî si tratave di cuistions une vore impuartantis, presentadis par bocje des autoritâts plui altis al plui alt sorestant dal guvier, ma cence sperance e cence pussibilitât di nissun risultât positîf: un discors, doi discors, trê discors; cualchi mieze promesse cence trop impegn, cualchi presute di retoriche su lis benemerencis eroichis dai furlans (Degasperi al à finît ancje lui cul capî che la retoriche e je il companadi dal talian!) e finide alî. Lis rognis no si risolvin cui "bombardaments" verbâi intune cerimonie uficiâl: al sarès ridicul pensâ che par vê ducj chei millions e miliarts che a coventin par meti in sest la Furlanie al basti che il president de provincie di Udin ju vebi iniment al president dal Consei di Rome! E alore, valie la spese di fâ dute chê scjalinade par lâ a sintî, e po tornâ jù cun chel savôr istès?

Dopo cene si tratave di une cjosse di nuie, une paesanade, un divertiment di sagra: robe di fruts. Ma cuant mai l'agnul dal cjistiel di Udin puedial vê viodût a messedâsi il "perdon" furlan cul "Kirchtag" carintian? Une robe di nuie? Intant che lis plui altis e lis plui espertis personalitâts de politiche internazionâl si struchin il çurviel, cence nissun costrut, a cirî il segret par sdrumâ lis paladis dai confins e i prejudizis nazionalistics, Furlans e Carintians, di bessôi, par chel amôr di pâs, par chel spirt di serietât e di lavôr che al regne tant di ca che di là de stangje, a son rivâts adore di realizâ cheste intese, di cjatâsi, di dâsi la man, di intindisi, cun dut che a fevelin lenghis diferentis. A son rivâts adore di cjalâsi intai voi, di fâsi bocje di ridi, di volêsi ben e di sintîsi prontos a judâsi come fradis.

E cheste "robe di nuie" e capite dopo che, par un secul e passe, la politiche taliane, e un pôc ancje chê de Austrie, e predicjave, e intziave, e comandave di odeâsi e dispresêsi: dopo che i parons di ca e di là a vevin discjadenadis

dôs vueris tra chescj popui; dopo che par comandament dai parons, si jerisi maludîts e sbeleâts e sbultricâts, insanganant chês stradis e chei trois che a varessin nome di unînus e di judânus a cognossisi e a vivi in buine armonie.

Cheste "robe di sagre" e je nassude par opare dai doi popui: cence discors uficiâi, cence promessis, cence cerimoniis: i doi guviers di Rome e di Viene no àn altri merit chechel di no vêle imberdeade. E par viodi in at cheste fraternitât, domenie di sere, al valeve la spese di fâ lis scjalis dal cjistiel di Udin.

josef marchet - Patrie dal Friûl - jugn 1950